



ՀԱՍՏԱՏՈՒՄ ԵՄ՝  
Շրջակա միջավայրի նախարար  
Հակոբ Սիմիդյան

«30» 06 2025թ.

## ՊԵՏԱԿԱՆ ՓՈՐՁԱՔՆՆԱԿԱՆ ԵԶՐԱԿԱՑՈՒԹՅՈՒՆ

ՇՐՋԱԿԱ ՄԻՋԱՎԱՅՐԻ ՎՐԱ ԱԶԴԵՑՈՒԹՅԱՆ ՓՈՐՁԱՔՆՆՈՒԹՅԱՆ

ԲՓ N 181 - 25

Նախաձեռնող՝

«Հայնախագիծ» ԲԲԸ  
ք. Երևան, Չարենցի 1

Գործունեությունը՝

Աշոցք համայնքի Բավրա բնակավայրում  
կրթահամալիրի կառուցում  
Շիրակի մարզ

Առդիր՝ 5 թերթ

**ՊԵՏԱԿԱՆ ՓՈՐՁԱՔՆՆԱԿԱՆ ԵԶՐԱԿԱՑՈՒԹՅՈՒՆ**  
**ՇՐՋԱԿԱ ՄԻՋԱՎԱՅՐԻ ՎՐԱ ԱԶԴԵՑՈՒԹՅԱՆ ՓՈՐՁԱՔՆՆՈՒԹՅԱՆ**

ԲՓ № 181 - 25

«30» հունիսի 2025թ.

**Աշոցք համայնքի Բավրա բնակավայրում կրթահամալիրի կառուցման շրջակա միջավայրի վրա ազդեցության գնահատման հաշվետվություն**

|                         |                                                                                         |
|-------------------------|-----------------------------------------------------------------------------------------|
| <b>Նախաձեռնող</b>       | «Հայնախագիծ» ԲԲԸ                                                                        |
| <b>Փաստաթղթի տեսակը</b> | Շրջակա միջավայրի վրա ազդեցության գնահատման (ՇՄԱԳ) հաշվետվություն, նախագծային փաստաթուղթ |
| <b>Գործունեությունը</b> | «Բ» կատեգորիա                                                                           |
| <b>Գտնվելու վայրը</b>   | Շիրակի մարզ, Աշոցք համայնք, Բավրա բնակավայր                                             |

**Ներածական մաս.** Համաձայն «Հայնախագիծ» ԲԲԸ-ի կողմից ներկայացված շրջակա միջավայրի վրա ազդեցության գնահատման հաշվետվության (այսուհետ՝ Հաշվետվություն) և նախագծային փաստաթղթի՝ Շիրակի մարզի Աշոցք համայնքի Բավրա բնակավայրում նախատեսվում է կրթահամալիրի (հզորությունը՝ 144 աշակերտական տեղով երկհարկանի միջնակարգ դպրոց և 80 տեղով մանկապարտեզ) կառուցում:

«Շրջակա միջավայրի վրա ազդեցության գնահատման և փորձաքննության մասին» օրենքի 12-րդ հոդվածի 4-րդ մասի 8-րդ կետի «ա» ենթակետի համաձայն՝ նախատեսվող գործունեությունը փորձաքննության է ենթարկվում քաղաքաշինության բնագավառում՝ որպես քաղաքաշինական գործունեության օբյեկտի կառուցում:

Նախատեսվող գործունեությունն իրականացվելու է անշարժ գույքի նկատմամբ իրավունքի պետական գրանցման վկայականով գրանցված (կադաստրային ծածկագիր՝ 08-026-0009-0059) պետական սեփականություն հանդիսացող 1,2 հա հողամասի սահմաններում, որի նպատակային նշանակությունը բնակավայրերի է, գործառնական նշանակությունը կամ հողատեսքը՝ հասարակական կառուցապատման: Նախատեսվող գործունեության հասցեն է Շիրակի մարզի Աշոցք համայնքի Բավրա բնակավայրի 2-րդ փողոց 6-10 հողամասում:

Նախատեսվող գործունեությունն իրականացվում է քաղաքաշինության կոմիտեի և Հայաստանի զարգացման հիմնադրամի պատվերով իրականացվող «Մինչև 2026 թվականը կառուցվող, հիմնանորոգվող կամ վերակառուցվող 300 դպրոցների» ծրագրի շրջանակներում՝ որպես վերջնական արդյունք սեյսմակայուն դպրոցների շենքերի տեսակարար կշիռն ապահովելու նպատակով:

**Նկարագրական մաս.** Նախատեսվող գործունեության տարածքը գտնվում է Բավրա բնակավայրի հյուսիս-արևելյան մասում՝ կառուցապատումից ազատ հողատարածքում: Հայցվող տարածքն ազատ է կառուցապատումից: Տարածքում ծառայալիքային բուսականություն առկա չէ: Հողամասի հեռավորությունը հարևանությամբ գտնվող ազատ հողատարածքներից կազմում է 9-50 մ, ճանապարհից՝ 19-32 մ:



Գեոմորֆոլոգիական տեսակետից տեղամասը գտնվում է Եղնախաղի լեռնաշղթայի արևելյան ճյուղավորման հարավային լանջերի ստորոտին հարող միջլեռնային փոքրաթեք հարթավայրի սահմաններում: Ռելիեֆի մակերևույթի բացարձակ նիշերը տատանվում են 2120.0 - 2125.0 մ սահմաններում: Շրջանի և տեղամասի երկրաբանական կառուցվածքը ներկայացված է նեոգենի հասակի հրաբխային հաստվացքով՝ ծածկված ժամանակակից գոյացումներով: Գրունտային ջրեր չեն բացահայտվել, գրունտային պայմանները, ըստ սեյսմիկ հատկությունների, 2-րդ կարգի են: Ֆիզիկաերկրաբանական վտանգավոր երևույթները, ինչպիսիք են կարստը, սողանքը, քարաթափությունը, փլուզումը, ճահճացումը և այլն, բացակայում են: Համաձայն ՀՀԾՆ 20.04-2020 նորմերի՝ տարածքը գտնվում է 3-րդ գոտում  $a=0.5g/$ :

Կրթահամալիրի կառուցապատման տեխնիկա-տնտեսական ցուցանիշներն են՝

- ընդհանուր հողատարածքի մակերես - 1.203 հա (100 %),
- կառուցապատման մակերես - 2030.56 քմ (16.85 %),
- կանաչապատման մակերես - 5206.5 քմ (43.4 %),
- բացօդյա մարզահրապարակի մակերես - 1528.03 քմ,
- ճանապարհներ - 1176,44 քմ,
- արևային կայանի տեղադրման մակերես - 2088.47 քմ:

Կրթահամալիրի ծավալա-տարածական լուծումն իրենից ներկայացնում է երեք իրար կցված՝ երկհարկանի մասնաշենքեր: Տիպային դպրոցը հատակագծում ունի 41.45x38.2 մ չափեր: Դպրոցի կենտրոնական մուտքը կազմակերպված է գոյություն ունեցող ճանապարհի կողմից, տնտեսական բակի մուտքը՝ հիմնական մայրուղու կողմից՝ 2-րդ դարպասից:

Տարածքի հարավ-արևմտյան մասում տեղադրվելու են մանկապարտեզի խաղահրապարակները, հարավ-արևելյան հատվածում՝ սպորտ հրապարակը՝ դիտատեղերով:

Ընդհանուր դպրոցի տարածքը ցանկապատվելու է մետաղական ցանցով: Նախատեսվում է ճանապարհի ասֆալտապատում, մայրերի և սավաճքների սալարկում, բացօդյա խաղադաշտի և սպորտհրապարակի հատակների իրականացում՝ հատուկ խառնուրդով, ռետինե ծածկույթով և արհեստական խոտածածկույթով:

Դպրոցի տարածքում նախատեսվող ջերմոցն (32 մ<sup>2</sup>) օգտագործվելու է բնագիտական առարկաների գործնական դասընթացների համար:

Էլեկտրամատակարարման և ջրամատակարարման միացումներն իրականացվելու են նախատեսվող գործունեության համար տրամադրված տեխնիկական պայմաններին համապատասխան: Բնակավայրը գազամատակարարված չէ:

Կրթահամալիրի տարածքում տեղադրվելու է 400 կՎտ հզորության լրակազմ տրանսֆորմատորային ենթակայան: Ենթակայանն աշխատելու է չոր եղանակով, իսկ սպասարկումն իրականացվելու է «ՀԷՑ» ՓԲԸ-ի կողմից:

Նախագծով նախատեսվում է 149,6 կՎտ դրվածքային հզորությամբ արևային ֆոտովոլտային համակարգի տեղակայում (2088.47 քմ): Տեղանքում հորիզոնական ճառագայթումը = 1337 կՎտ\*ժ/մ է: Արևային ֆոտովոլտային համակարգը կազմված է 272 հատ միաբյուրեղային 144 (6x24) կեսբջիջներով, 550 Վտ պիկային հզորությամբ ֆոտովոլտային (ՖՎ) վահանակներից, որոնք բաժանված են 24 ՖՎ խմբի՝ 8 խումբ յուրաքանչյուր փոխակերպիչի համար:

Ջրամատակարարման համակարգը սնվելու է նկուղային հարկում տեղադրվող ռեզերվուարներից, որոնց կից տեղադրվելու է պոմպային համակարգ: Ջրամատակարարման ներքին ցանցը նախատեսվում է պոլիպրոպիլենային PPR PN10 խողովակներից և ջերմամեկուսացվելու են 10 մմ հաստությամբ ռետինե



խողովակակտորներով: Տաք ջրամատակարարման համակարգը սնվելու է նկուղային հարկում նախատեսվող կաթսայատնից:

Կենցաղային կոյուղու ցանցը համակցված է: Կոյուղագիծը միանալու է տարածքում կառուցվող կոյուղու մաքրման Топак 100 սարքավորմանը (հզորությունը 3 л/վրկ): Սարքավորումը կատարում է եռաստիճան մաքրում: Նախատեսվել է դրենաժային հորատանցք ավելցուկային ջրերի հեռացման համար:

Եղանակային տեղումներից առաջացող հոսքաջրերն ինքնահոս հավաքվելու և ուղղվելու են տարածքի հարավային հատվածում տեղադրվող դիտահոր, որտեղից հեռացվելու է դեպի ջրահեռացման առու:

Անձրևաջրերի բակային ցանցը նախատեսված է իրականացնել ինքնահոս՝ DN200-DN300, SN 8 պոլիէթիլենե (PE) ծալքավոր կոյուղու խողովակներով: Տարածքում նախատեսված անձրևընդունիչների միջոցով ջրերը հավաքվում են և ուղղվում տարածքի հարավային հատվածում նախատեսվող ԴՀ K2 - 16 դիտահոր, որտեղից հեռացվում դեպի ջրահեռացման առու:

Էներգախնայողության և էներգաարդյունավետության ապահովմանն ուղղված իրականացվելու են միջոցառումներ, այդ թվում՝ շենքի երեսպատման համակարգի, բարձր էներգաարդյունավետությամբ պատուհանների տեղադրում, տանիքի և ստորգետնյա հարկի ջերմամեկուսացում և այլն: Հաշմանդամ և բնակչության սակավաշարժ խմբերի ազատ տեղաշարժման համար ձեռնարկվել են համապատասխան միջոցառումներ (թեքահարթակներ, միջհարկային ամբարձիչ և այլն):

Կրթահամալիրն ապահովված է լինելու արտաքին լուսավորության, օդափոխության, ծխահեռացման և հակահրդեհային համակարգերով, էվակուացիոն ուղիներով:

Շինարարական աշխատանքների տևողությունը կազմում է 24 ամիս կամ 624 օրացուցային օր:

Շինարարական մեքենաներից և մեխանիզմներից օգտագործվելու են աշտարակային կոունկ, ինքնաթափ ավտոմոբիլ, բուլդոզեր, շարժական կոմպրեսոր, էքսկավատոր, ձեռքի գործիքներ և այլն: Շինարարական տեխնիկայի վառելիքի լիցքավորումը և յուղումն իրականացվելու են շինհրապարակից դուրս լցակայաններում կամ սպասարկման կետերում:

Շինարարական նյութերից օգտագործվելու են երկաթբետոն, սրբատաշ և կոպտատաշ քար, փայտ, մետաղ, ապակի, երեսապատման բարձրորակ նյութեր և այլն: Հողային ռեսուրսների պահպանության նպատակով շինարարական նյութերը տեղադրվելու են բետոնապատ մակերեսի վրա: Շինարարական աշխատանքների իրականացման համար անհրաժեշտ բետոնի խառնուրդը կմատակարարվի բետոնատար ավտոմեքենաներով՝ պայմանագրային հիմունքներով:

Շինհրապարակում պահեստավորվելու են շինարարության համար անհրաժեշտ նյութերը, կայանվելու է շինտեխնիկան, տեղադրվելու են ժամանակավոր շինություններ, ինչպես նաև՝ մեքենաների անիվների լվանալու հարթակ:

Նախագծի հողային աշխատանքներից առաջացող է 26113 մ<sup>3</sup> հողային հանույթից հետոյիցքը կազմում է 7000 մ<sup>3</sup>: Հետոյիցքի համար նախատեսված հողային հանույթը կարճաժամկետ կպահվի շինարարական հրապարակում և պարբերաբար կիրականացվի ջրցան՝ փոշեգոյացումը կանխելու նպատակով: Մնացած վտանգավոր նյութերով չաղտոտված 19113 մ<sup>3</sup> հողային հանույթը կհեռացվի ու կտեղադրվի տեղական ինքնակառավարման մարմինների կողմից հատկացված վայր:

Կենցաղային աղբը հավաքվելու է աղբահավաք տարողությունների մեջ և հեռացվելու է տարածքից մասնագիտացված կազմակերպությունների կողմից՝ տարածքում բացառելով կենցաղային աղբի կուտակումը և այրումը:



Շինարարության փուլում աշխատողների կոմունալ կենցաղային պայմանները կապահովվեն ժամանակավոր կառույցների տեղադրմամբ՝ ապահովելով շինհրապարակում սանիտարահիգիենիկ, կենցաղային և հանգստի պայմանները:

Ջուրն օգտագործվելու է շինհրապարակի ջրցանման, անիվների լվացման և կապալառուի աշխատակազմի խմելու և կենցաղային կարիքները հոգալու համար: Ընդհանուր ջրօգտագործումը հաշվարկվել է ըստ սպասարկող աշխատողների թվաքանակի (47 մարդ), 8000 մ<sup>2</sup> ջրվող տարածքի և անիվների լվացման համար: Ընդամենը ջրօգտագործումը կկազմի 4672,62 մ<sup>3</sup>/շին. ժամ:

Շինարարական աշխատանքների ավարտից հետո նախատեսվում է տարածքը կանաչապատել՝ Կառավարության 2018 թվականի փետրվարի 8-ի N 108-Ն որոշման համապատասխան: Տարածքի շուրջ 43.4 %-ը (5227.4 քմ) նախատեսվում է կանաչապատել արժեքավոր և տեղանքի բնակլիմայական առանձնահատկություններին համապատասխան ծառաբուսատեսակներով: Տնկվելու են թխկի սրատերև կարմիր (32 հատ), գնդաձև իլենի (54 հատ), բարդի արծաթափայլ (26 հատ), ցանվելու են սիզամարգի սերմեր: 7230 մ<sup>3</sup> բուսահողի հանումը, պահպանումը և օգտագործումը իրականացվելու է ՀՀ գործող օրենսդրության պահանջներին համապատասխան:

Կրթահամալիրի տարածքում տեղադրվելու են ջրի երկու ռեզերվուար, ամբարած ջուրն օգտագործվելու է դպրոցի կանչապատ գոտիների ոռոգման և հրդեհամարման կարիքների համար:

Հաշվետվությունում ներկայացվել են նախատեսվող գործունեության աշխատանքների ազդեցությունները շրջակա միջավայրի (մթնոլորտային օդ, հող, ջրային ռեսուրսներ, կենսաբազմազանություն) և մարդու առողջության վրա և մշակվել են միջոցառումներ՝ հնարավոր վնասակար ազդեցությունները կանխարգելելու կամ մեղմելու նպատակով: Նախատեսվել են շրջակա միջավայրի վրա բացասական ազդեցության կանխարգելմանն ու մեղմմանն ուղղված մշտադիտարկումներ:

Բնապահպանական միջոցառումների համար նախատեսվում է տարեկան մասնահանել 350 հազ. ՀՀ դրամ, ամբողջ շինարարության ընթացքում՝ 700 հազ. ՀՀ դրամ:

**Պատճառաբանական մաս.** Նախատեսվող գործունեության փորձաքննությունն իրականացվել է «Շրջակա միջավայրի վրա ազդեցության գնահատման և փորձաքննության մասին» օրենքով սահմանված պահանջներին համապատասխան: Կրթահամալիրը կառուցվելու և շահագործվելու է գործող օրենսդրական պահանջներին համապատասխան: Նախատեսվող գործունեության դիտարկվող տարածքը կառուցապատված չէ, շրջակա միջավայրի վրա ազդեցությունները շինարարության փուլում լինելու են կառավարելի և կրելու են կարճատև բնույթ:

Փորձաքննական գործընթացին մասնակցել են առողջապահության, ներքին գործերի, կրթության, գիտության, մշակույթի և սպորտի նախարարությունները, քաղաքաշինության և կադաստրի կոմիտեները, Շիրակի մարզպետարանը, Աշոցքի համայնքապետարանը: Հաշվետվությունը լրամշակվել է նաև ստացված դիտողությունների և առաջարկությունների հիման վրա:

Օրենսդրությամբ սահմանված կարգով՝ Աշոցք համայնքի Բավրա բնակավայրի վարչական ղեկավարի նստավայրում իրականացվել են երկու հանրային խորհուրդներ: Նախատեսվող գործունեությունը մասնակիցների կողմից արժանացել է հավանության:



## Փորձաքննական պահանջներ

1. Շինարարական աշխատանքների իրականացման ընթացքում հետևել Հաշվետվությամբ ներկայացված բնապահպանական միջոցառումների կատարմանը, դրանց չբավարարման դեպքում նախատեսել հավելյալ միջոցառումներ:
2. Շինարարական աշխատանքների իրականացման ընթացքում բացառել հարակից տարածքով հոսող ջրային ռեսուրսի աղտոտումը:
3. Բացառել նախատեսվող գործունեության շինարարական աշխատանքները հարակից տարածքում գոյություն ունեցող ջրատարերի պահպանման գոտում, ինչպես նաև շինտեխնիկայի կայանումը տվյալ տարածքներում:
4. Կանաչապատման աշխատանքներն իրականացնել՝ ապահովելով Հաշվետվությամբ և նախագծային փաստաթղթով նշված կանաչապատման և բարեկարգման լուծումները՝ համաձայնեցված տեղական ինքնակառավարման մարմինների հետ:
5. Մշտադիտարկման արդյունքներով պայմանավորված՝ գործունեության և հարակից տարածքներում ՀՀ Կարմիր գրքերում գրանցված բուսատեսակների և կենդանատեսակների ապրելավայրերի հայտնաբերման դեպքում առաջնորդվել գործող օրենսդրական պահանջներով:
6. Շինարարության և շահագործման փուլերում թափոնների կառավարումն իրականացնել օրենսդրությամբ սահմանված կարգով և համաձայնեցված տեղական ինքնակառավարման մարմինների հետ:
7. Համաձայն ՀՀ կառավարության 2002 թվականի ապրիլի 20-ի N 438 որոշման 43-րդ կետի՝ աշխատանքների կատարման ժամանակ պատմական, գիտական, գեղարվեստական և այլ մշակութային արժեք ունեցող հնագիտական և մյուս օբյեկտների հայտնաբերման պահից դադարեցնել աշխատանքները և դրա մասին անհապաղ հայտնել լիազորված մարմնին:

## ԵԶՐԱՓԱԿԻՉ ՄԱՍ

«Հայնախագիծ» ԲԲԸ-ի կողմից ներկայացված՝ Շիրակի մարզի Աշոցք համայնքի Բավրա բնակավայրում կրթահամալիրի կառուցման՝ շրջակա միջավայրի վրա ազդեցության գնահատման հաշվետվությանը տրվում է պետական փորձաքննական դրական եզրակացություն՝ փորձաքննական պահանջների պարտադիր կատարման պայմանով:

«Շրջակա միջավայրի վրա ազդեցության փորձաքննական կենտրոն» ՊՈԱԿ-ի տնօրենի ժամանակավոր պաշտոնակատար՝

Սևակ Մարկոսյան

«Շրջակա միջավայրի վրա ազդեցության փորձաքննական կենտրոն» ՊՈԱԿ-ի տնօրենի տեղակալ՝

Հերիքնազ Մկրտչյան

«Շրջակա միջավայրի վրա ազդեցության փորձաքննական կենտրոն» ՊՈԱԿ-ի առաջատար մասնագետ՝

Աստղիկ Վարդանյան